



NA LICU MJESTA Akcija SIPA-e nakon izvještaja italijanske TV

Uhapšeni Nermin Sejdić i Davor Jarčević zbog trgovine oružjem



Oružje nije pronađeno, ali jesu dokazi i indicije za trgovinu narkoticima • Uhapšeni Sejdić rođen u Đenovi u Italiji, a krio se iza lažnog imena

U spektakularnoj akciji Državne agencije za istrage i zaštitu BiH (SIPA) i Granične policije jučer su u Sarajevu uhapšeni Nermin Sejdić (30) i Davor Jarčević (34), saznaje „Dnevni avaz“ iz izvora bliskih istrazi. Ova akcija uslijedila je odmah nakon što je objavljena videoreportaža italijanskog novinara Luidija Pelace (Luigi Pelazza), voditelja i autora popularne italijanske emisije „Le Iene“ (Hijene), koja se emitira na televiziji Italia 1.

Pokušao pobjeći

Pelaca je uradio intriguantanu reportažu o kupovini ilegalnog oružja u BiH, a nakon emitiranja bh. vlasti su pokrenule istragu. Skrivenom kamerom snimao je susret s vezom u BiH koja ga je dalje povezala s prodavačima oružja u raznim dijelovima BiH. Njegova veza iz BiH ugostila ga je u svojoj kući, dakle u sarajevskom naselju Gorica, gdje je jučer i provedena ova akcija.

Kako saznajemo, uhap-



Ekskluzivne fotografije do kojih su došli reporteri našeg lista iz kuće gdje je obavljen pretres na Gorici

šeni Sejdić rođen je u Đenovi u Italiji, a prijavljeno prebivalište mu je u Sarajevu. Jarčević se krio iza lažnog imena, a akcijom je rukovodila operativna grupa za borbu protiv terorizma. Tokom pretresa objekta nije pronađeno nikakvo oružje, ali jesu tragovi finansijskih transakcija koje su uplaćivane od pojedinih osoba iz Italije. Reporter „Dnevnog avaza“ bili su jučer na licu

mjesta. U sarajevskom naselju Gorica vladalo je opsadno stanje dok je trajao pretres. Jedan od uhapšenih pokušao je pobjeći, ali je savladan u neposrednoj blizini kuće u kojoj se nalazio i uhapšen. Prilikom hapšenja odbacio je crni rukav, koji su istražitelji pomoću psa tragača i pretresli. U njemu su, također, pronađeni predmeti koji će poslužiti u daljnjoj istrazi.

Naši sagovornici koji su učestvovali u hapšenju ovih osoba tvrde da su one negirale bilo kakvu povezanost sa švercom oružja i da su učestvovali u snimanju videa koji je nastao od 3. do 6.

jula ove godine u Sarajevu.

- Sad je pitanje je li uopće obavljena trgovina oružjem ili je to smišljen film. Mnogo je toga čudno. Oružje nije napustilo granicu BiH kako se tvrdilo, ali nije pronađeno. Sve djeluje kao obmana, ali vidjet ćemo još – kaže naš sagovornik iz istrage.

Vojna oprema

Iz SIPA-e su jučer saopćili da su pripadnici ove agencije u saradnji s Graničnom policijom po naredbi Suda i Tužilaštva BiH pretresli jedan objekt i uhapsili dvije osobe.

- Navedena lica dovode

se u vezu sa spornim snimkom italijanskog novinara, i lišena su slobode zbog postojanja osnova sumnje da su počinila krivično djelo neovlaštenog prometa oružjem i vojnom opremom. Pretresom objekta pronađeni su i privremeno oduzeti

predmeti koji će se u daljem postupku koristiti kao dokazi. Nakon kriminalističke obrade u prostorijama SIPA-e, nadležni tužilac Tužilaštva BiH će odlučiti o daljnjem statusu lica lišenih slobode – saopćeno je iz Državne agencije. **M. AŠČIĆ – E. TRAKO**



Jarčević: Jedan od uhapšenih

Ko je Roberto Moreti

Nezvanično saznajemo da su predmeti koji se spominju u saopćenju SIPA-e su uplatnice od po 150 eura na ime italijanskog državljanina,

izvjesnog Roberta Moretija. Osim oružja, predmet istrage bila je i trgovina određenim količinama droge – heroina.